

自足怡然若將終身焉於是潁川孺子聞而往從之躡屐  
擔簞披衣踵門及階而止望帷而稱曰不敏聞先生之誼  
敢侍於下風先生矍然驚曰孺子來吾惡夫世人之保我  
也久矣而不能使人之無我保則戶外之屢滿焉將命歟  
吾無所逃此雖然孺子何爲者也孺子曰幼而多治長而  
屢窮遭先生乎齟齬之途陪先生乎寂寥之事樂先生之  
所爲樂者以白吾首其已乎先生啞然笑曰孺子上吾以  
樂而未嘗無以樂者順也羈旅於吾有時矣亦嘗聞杭之  
山川人物雄秀奇麗兮靡饒阜可樂者乎孺子曰先生不  
以不敏爲難與言得聞咳唾之音不敏以爲幸先生將何

以教之先生曰杭之故封左浙江右具區北大海南天目  
萬川之所交會萬山之所重複或瀨或湍或灣或淵或岐  
或孤或袤或連滔滔湯湯渾渾洋洋纍纍硜硜隆隆叩叩  
若金城天府之疆其民旣庶而有餘旣狡而多娛可導可  
疏可舳可桴可跋可踰可攢可車若九洲三山接乎人世  
之廬連延迤邐環二千里邑居收聚蟻合蜂起高城附之  
如帶繞指隱以爲脊折以爲尾因河塹華不足方比方城  
漢水胡敢競美當昔夫差之盛時內姑蘇以爲心腹而外  
城此以爲身軀車千乘甲士萬人粟支十年帛散千屯灑  
汗成雨連袂成雲乃有大夫伯嚭行人伍員之徒通其謀